

Morning Dogri (NSD) National News Bulletin 19-01-2025

आकाशवाणी

- प्रधानमंत्री नरेन्द्र मोदी होर अज्ज बडलै 11 बजे आकाशवाणी थमां अपने म्हीनेवार “मन की बात” कार्यक्रम च लोकें कन्नै अपने बचार सांझे करगन।
- चंडीगढ़ च सीबीआई दी इक अदालत हिमाचल प्रदेश दे शिमला जिले च 2017 दे कोब्लर्ड दुष्कर्म ते हत्या आले मामले दे इक आरोपी दी हिरासतै च हत्या दे केस च पुलस महानिरीक्षक जहूर हैदर जेदी ते 8 होरने पुलस कर्मिएं गी कसूरवार ठैहराया ऐ।
- समूलचे उत्तर भारत सनें मुख्यै दे नेकें हिस्से च ठंडू दा प्रकोप बरोबर जारी।
- विश्व बैंक नै भारत लेई 6.7 फीसद दी वृद्धि दा अंदाजा जाहर कीता ऐ जेहड़ा वैश्विक दर थमां 2.7 फीसद मता ऐ।
- गजा च इजराइल ते हमास बश्कार संघर्ष विराम समझौता भारतीय समें मताबक अज्ज दपैहरी 12 बजे थमां लागू होइ जाग।
- खो खो विश्व कप च भारतीय मर्दे ते महिला दिएं टीमें शानदार प्रदर्शन करदे होई फाइनल च अपनी थाहर बनाई लैती ऐ।

<><><><><><>

PM Mann Ki Baat

प्रधानमंत्री नरेन्द्र मोदी होर अपने माहवार रेडियो कार्यक्रम ‘मन की बात’ दे राएं अज्ज अपने विचार, देश-विदेश च रौहने आहले श्रोताएं कन्नै सांझे करडन। उ’आं ते एह प्रोग्राम म्हीने दे अखीरले ऐतवारें दिनै 11 बजे प्रसारित होंदा ऐ पर ऐकती खीरी ऐतवार 26 जनवरी होने करी, एहदा प्रसारण इक हफ्ता पैहले कीता जा’रदा ऐ। एह इस कार्यक्रम दी 118मीं किश्त होग। एहदा प्रसारण आकाशवाणी ते दूरदर्शन दे समूलचे नेटवर्क उप्पर कीता जाहग। एहदे अलावा प्रधानमंत्री हुंदे दफ्तर, सूचना ते प्रसारण मंत्रालय ते आकाशवाणी ते दूरदर्शन दे यूट्यूब चैनलें पर बी एहदा लाईव प्रसारण होग। आकाशवाणी पर दिनै 11 बजे एहदे हिंदी प्रसारण दे तुरत मगरा इलाकाई भाषाएं च एहदा अनुवाद बी प्रसारित कीता जाहग।

<><><><><><>

PM-Cultural

प्रधानमंत्री नरेन्द्र मोदी होरें भारत दी संसद कन्नै तैआर, जाफना दे मन्ने परमन्ने दे सांस्कृतिक केन्द्र दा नां तिरुवल्लुवर सांस्कृतिक केन्द्र रखे जाने दा सुआगत कीता ऐ। सोशल मीडिया दी इक पोस्ट च मोदी होरें आखेबआ जे एह भारत ते श्रीलंका बशकार लोकें दे मजबूत सांस्कृतिक, भाईचारे, ऐतिहासक ते सभ्यतागत सरबंधें गी बी दर्शादा ऐ।

<><><><><><>

CBI-HP

चंडीगढ़ च सीबीआई दी इक अदालत, हिमाचल प्रदेश दे शिमला जिले च 2017 दे कोटखई दुष्कर्म ते हत्या आले मामले दे इक आरोपी सूरज दी हिरासत च हत्या दे मामले च पुलस महानिरीक्षक जहूर हैदरा जेदी ते 8 होरनें पुलसकर्मिणं गी दोषी ठैहराया ऐ। ध्यानजोग ऐ जे स्वीच्य अदालत दे आदेश मगरा चंडीगढ़ दी सीबीआई कोर्ट च मुकदमा चलाया गेआ हा। इस मामले च 27 जनवरी गी सजा सुनाई जाग। पुलस महानिरीक्षक ते 8 होर पुलस कर्मिणं गी हिरासत च लेई लैता गेआ ऐ। गुड़िया हत्याकांड दे 14 दिन मगरा कोटखई थाने दे लॉकअप च आरोपी सूरज दी हत्या करी दित्ती गई ही।

<><><><><><>

IMD

समूलचे उत्तर भारत सनें मुल्खै दे केइं हिस्से च ठंडू दा प्रकोप बरोबर जारी ऐ। पंजाब, हरियाणा, चंडीगढ़, दिल्ली, उत्तर प्रदेश ते राजस्थान दे मते होर इलाकें च धुंध ते घना कोहरा छाए दा ऐ। मौसम विभाग नै आखेआ जे मध्य प्रदेश, पच्छिम बंगाल दे उप-हिमालयाई क्षेत्र, सिक्किम, असम, मेघालय, नागालैंड, मणिपुर, मिजोरम ते त्रिपुरा च 21 जनवरी तगर मौसम इआं गै बने दा रौहग। मौसम विभाग नै तमिलनाडू, पुदुचेरी, कराईकरल, केरल ते माहे च कुदे-कुदे तेज बरखा दा अनुमान जाहर कीता ऐ। अज्ज केरल ते माहे च बरखा ते तेज हवा चली सकदी ऐ। कोमोरिन ते मन्नार दी खाड़ी कन्नै लगदे इलाके च 45 किलोमीटर पही घेंटे दी रफतार कन्नै हवा चली सकदी ऐ। मच्छुआरें गी इनें इलाकें च नेइं जाने दी सलाह दित्ती गई ऐ।

<><><><><><>

Indian Economy

विश्व बैंक नै भारत आस्तै 6.7 फीसद दी वृद्धि दा अंदाजा जाहर कीता ऐ जेहड़ा वैश्विक दर थमां 2.7 फीसद मता ऐ। विश्व बैंक दे वैश्विक आर्थिक अनुमान जीआईपी रिपोर्ट दे जनवरी

2025 संस्करण च आखेआ गेआ ऐ जे भारत अगले 2 माली ब'रे आस्तै सब्बने थमां तेजी कन्नै बघने आली अर्थबवस्था दे तौर परअपनी स्थिति गी बरकरार रखदे होई वैश्विक आर्थिक परिदृश्य पर अपना दबदबा बनाई सकदा ऐ। रिपोर्ट च एह् बी अनुमान लाया गेआ ऐ जे अगले ब'रे ची नदी आर्थिक वृद्धि घातियै 4 फीसद रेई जाग। विश्व बैंक दी रिपोर्ट दी सराहना करदे होई अंतर्राष्ट्रीय मुद्रा कोष ते विश्व आर्थिक परिदृश्य नै बी भारत दी मजबूत आर्थिक प्रगति दी तज़स्दीक कीती ऐ।

<><><><><><>

Gaza

गजा च इजराइल ते हमास बश्कार संघर्ष विराम समझौता भारतीय सभें मूजब अज्ज दपैहरी 12 बजे थमां लागू होई जाग। एह्दे थमां पैहले कल इजराइली सुरक्षा कैबिनेट नै गी मंजूरी देई दित्ती। समझौते च इजराइल दी जेलें च बंद फलस्तीन दे कैदिएं दे बदले च हमास दे कब्जे च इजराइल दे बंधकें दी रिहाई ते 15 महीने थमां चला'रदे संघर्ष दा अस्थाई विराम शामिल ऐ। पर संघर्ष विराम लागू होने थमां किश घैंटे पैहले गै इजराइल दे प्रधानमंत्री बेंजामिन नेतन्याहू होरें आखेआ जे गजा युद्ध विराम समझौता अस्थाई होई सकदा ऐ ते इजराइल कश गजा संघर्ष परतियै शुरू करने दा अधिकार ऐ। उनें हमास थमां पैहले गेड़ च रिहा होने आले 33 बंधकें दी सूचि देने लेई आखेआ।

<><><><><><>

HM-NDRF

केन्द्रीय गृहमंत्री अमित शाह होर कल आंध्रप्रदेश दे विजयबाडा च राष्ट्री आपदा मोचन बल एनडीआरएफ दे 20में स्थापना दिवस समारोह च शामिल होंगन। इस मौके पर श्री शाह होर दौ सौ करोड़ रुपे शा बद्ध दिएं परियोजना दा उद्घाटन ते नीह पत्थर रखगंन। राष्ट्री आपदा प्रबंधन संगठन दे दक्खनी परिसर ते सयोल च क्षेत्री आपदा प्रबंधन केन्द्र दे परिसर सनें त्रै महत्वै आले केन्द्रें दे परिसरें दा उद्घाटन कीता जाग। श्री शाह होर हैदराबाद च राष्ट्री पुलस अकादमी च 50 मीटर लम्मी ते 10 लेन दी इक नमीं एकीकृत इंडोर शूटिंग रेंज दा नीह पत्थर रखगंन। यात्रा दरान गृहमंत्री होर तिरुपति च राज्य सरकार दी क्षेत्रीय फोरेंसिक विज्ञान प्रयोगशाला दी ईमारत दा बी उद्घाटन करगंन।

<><><><><><>

Amit Shah Rajouri

केन्द्री गृहमंत्री अमित शाह होरें राजौरी जिले दे बडहाल ग्रां च होई दिएं रहस्युयी मौतें दी जांच लेई इक अंतर मंत्रालय टीम दा गठन करने दी घोषणा कीती ऐ। गोरतलब ऐ जे बडहाल ग्रां च हुनै तगर 16 लोकें दी कुसै रहस्यमयी बमारी दे कारण मौत होई गेदी ऐ। अंतर-मंत्रालय टीम जेह्दी अगुवाई गृह मंत्रालय करा करदा ऐं। अज्ज बडहाल दा दौरा करग। इस टीम च सेहत, राई-बाई, रसायने ते हैल ते पानी सरबंधे साधने-स्रोतें दे मंत्रालये दे विशषज्ञ रखे गेदे न। टीम दे सदस्य, स्थानीय प्रशासन कन्नै मिलियै प्रभावत परोआरें गी फौरी राहत पजांगन ते भविक्ख च इयै नेह् हादसैं कोला बचने आस्तै एह्तियादी उपाह् लागू करगंन। तोआई उपराज्यपाल मनोज सिन्हा होरें गृहमंत्री शाह हुंदा विशेष जांच टीम दे गठन लेई ते उसी राजौरी दे बडहाल ग्रां भेजने लेई णन्नबाद कीता ऐ।

<><><><><><>

Kho Kho

खो खो विश्व कप च भारतीय मर्दे ते महिला टीमें शानदार प्रदर्शन करदे होई फाइनल च अपनी थाहर बनाई लैती ऐ। फाइनल च उंदा मकाबला नेपाल कन्नै होग। कल इक रोमांचक मकाबले च मर्दे दी टीम नै दक्खन अफ्रीका गी 62-42 कन्नै हराया। खेड दे पैहले चरण च दक्खन अफ्रीका नै दमदार शुरूआत कीती पर अगले चरण च भारत नै शानदार वापसी कीती। तोआई भारतीय महिला टीम नै बी सैमीफाइनल च दक्खन अफ्रीका खलाफ 66-16 दे बड्डे फर्क कन्नै जित्त हासल कीती। इस जित्त मगरा महिला टीम दी कोच सुमित भाटिया होरें आखेआ जे भारतीय टीम फाइनल खेडने आस्तै पूरी चाल्ली आत्म विश्वास कन्नै भरोची दी ऐ।

<><><><><><>